



INATSISARTUT

Aningaasaqarnermut Akileraartarnermullu Naalakkersuisoq

Ulloq: 23. marts 2026
J.nr.: 01.31.06/26-01168

Marlunngornermi ulloq 17. marts 2026 Aningaasaqarnermut Akileraartarnermullu Ataatsimiititaliap aalajangiinera pillugu Naalakkersuisunut ilisimatitsissut.

Utoqqaat peqatigiiffiata Utoqqaat Nipaata isumasioqatigiinnissaanut ilassutitut aningaasaliissut. Ataatsimiititaliap suliaa nr. 01.31.06/26-01168.

”Naalakkersuisut inassutigaa,

- aningaasanut inatsit kontoani 20.11.50 Ingerlatsinermit sillimmatit 500.000 kr.-nik appartinneqassasut, aamma
- aningaasanut inatsit kontoani 31.01.02 Utoqqaat peqatigiiffiannut tapiissutit annertoqataanik 500.000 kr.-nik qaffanneqassasut.”

Aningaasaqarnermut Ataatsimiititaliap oqaaseqaatai apeqqutaalu

Apeqqut 1

Aningaasaliinissamut nutaamut imaluunniit allannguinnissamut qinnuteqaammi taamaallaat iliuusissat aningaasartuutitigut ukiumi aningaasaqarfiusumi sunniuteqartussaassasut missingersuutit pillugit malittarisassani (2008-meersumi qup. 9) allassimavoq. Peqatigisaanik ilassutitut aningaasaliissuteqarnissamik qinnuteqaammi matumani pineqarput iliuutsit naalakkersuisooqatigiinnissamik 2025-mi isumaqatigiissuteqarnerup kingorna aningaasanut inatsit aqqutigalugu 2025-mi iliuuserineqarsimasariaqaraluartut.

Tamanna tunngavigalugu ilassutitut aningaasaliissuteqarnissamik qinnuteqaat una sooq 2026-mi nassiunneqarsinnaanersoq Naalakkersuisunit nassuiarneqarsinnaava?

Apeqqut 2


Isumaginninnermut, Suliffeqarnermut, Ineqarnermut Attaveqarnermut Isorliunerusunullu Naalakkersuisup Utoqqaallu Nipaata akornanni attuumassuteqarnermik ajornartorsiuteqarsinnaanera pissutigalugu ilassutitut aningaasaliissuteqarnissamik qinnuteqaammik suliarinninneq Aningaasaqarnermut Akileraartarnermullu Naalakkersuisoqarfimmit isumagineqarsimasoq Naalakkersuisut isummernissaannut tunngavissiami allassimavoq.

Attuumassuteqarnermik ajornartorsiuteqarsinnaaneq Naalakkersuisunit itisilerneqarsinnaava?

Aningaasaqarnermut Ataatsimiititaliap aalajangiinera

Qulaani allassimasutuut apeqquteqarluni Naalakkersuisut inassuteqaataat ataatsimiititaliap amerlanerussuteqartup **akuerai**.

Inussiarnersumik inuulluaqqusillunga



Erik Jensen

Aningaasaqarnermut Akileraartarnermullu Ataatsimiititaliap siulittaasua